

Timersorneq pillugu inatsimmi e-sport timi atorlugu timersuutitut allatuulli akuerisaanissaa pillugu Naalakkersuisut inatsimmut allannguutissatut siunnersuuteqaqqullugit peqquneqarnissaannik Inatsisartut aalajangiiffissaattut siunnersuut.

(Atassutip Inatsisartuni ilaasortai)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Atassutip Inatsisartunut ilaasortaataat, Inatsisartut aalajangiiffigisassaattut siunnersuummik saqqummiussinerannut Naalakkersuisut qutsavigaat.

E-sport-ip Timersorneq timigissarnerlu pillugit Inatsisartut inatsisaannut nr. 15, 6. juni 2016-imeersumut (Timersornermut inatsit) ilaanngitsutut isigineqarnera ilumoorpoq. Timersorneq timigissarniarluni aamma peqqissarniarluni timi atorlugu sammisaqarneq timersornermut inatsimmi § 2, imm. 1-imi aalajangersarneqarpoq. E-sport taamatut sammisanik imaqaanngitsutut nalilerneqarpoq.

Taamaammallu e-sport timersornermut inatsimmut ilaalissappat inatsimmi timersornerup nassuiarneqarnerata allanngortinnissaa pisariaqassaaq. Tamanna killeqartitsinissamut apeqqutinik ajornartunik kinguneqariaannaavoq, Timersornerlu pillugu inatsit massakkornit siammasinnerusumik atuuffeqalersinnaalluni.

E-sport nunarsuaq tamakkerlugu sukkasuumik ineriartorpoq, aamma nunatsinni. Naalakkersuisut siunnersuuteqartoq, sammisaq nutaaq, pingaartumik inuusunnerusut akornanni aallutarineqalersoq, tapersersugassaanerarnanur isumaqataapput.

E-sport uagutsinnut nunarsuullu sinneranut nutaarluinnaavoq. Taamaattumik e-sportimik aallutaqartut qanoq kattuffiliortarnersut, e-sportimik aallutaqartunut taakkualu avatangiisaannut qanoq sunniuteqartarnersoq qanorlu e-sportip siunissami sunnissaneraatigut ilisimasaqarfiginngingajappavut. Nunalli allat sammisamut tassunga qanoq qisuariarsimanersut qiviarsinnaavagut.

Esport Danmark Danmarkimi e-sportertartut pisortatigoortumik kattuffigivaat 2007-imi pilersinneqartoq, kingornalu International E-sports Forbundimik pilersitseqataasoq. Esport Danmarkip pilersinneraniit ukiut qulit qaangiutereersut Danmarkimi Folketingi e-sportip siuarsarneqarnissaanut aningaasanik immikkoortitsisimavoq, taakkunungalulu ilaavoq e-sportimik unamminerit ingerlattarnissaat. Taamaakkaluartoq Danmarks Idrætsforbundip e-sport timersuutitut isigineqarnissaa akuerisimanngilaa. Danmarks Idrætsforbundilli suliniuteqarfiit anguniagaqarfiusut aqqutigalugit e-sportip timersornerullu akornanni

piukkunnaatit suleqatigiiffiusinnaasullu pilersinnaasut, taakkualu qanoq imminnut pitsaasumik ineriartortitsiiffiusinnaanerat pillugit ilisimatusartoqarnissaanik kissaateqarsimavoq. Tamanna nunatsinni timersornerup e-sportillu akornanni assingusumik suleqatigiittoqarnissaanut isumassarsiornissamik pilersitsisinnaavoq.

Naalakkersuisut erseeqqissaatigissavaat malittarisassat atuuttut malillugit tapiissuteqarnissaq aamma periarfissaassammat, naak e-sport timersornermut ilaasutut akuerineqarsimanngikkaluartoq. Aningaasanoorutit ilaannit aningaasanik agguaassisarneq pillugu tapeeriaatsit, tapiiffigineqarnissamut piunasaqaatit il.il. pillugit Namminersorlutik Oqartussat nalunaarutissaatut nr. 16, 11. maj 2020-meersoq siunnersuut innersuussutigineqarpoq. Malittarisassat taakku atorlugit pilersaarusiornermut ingerlatsinermullu tapiissutinik tunniussisinnaasoqassaaq. Ingerlatsinermullu tapiissutit nuna tamakkerlugu peqatigiiffinnut kattuffinnullu taamaallaat tunniunneqarsinnaapput. E-sportimillu aallutaqartut ingerlatsinermut tapiiffigineqarniarunik kattuttariaqarput.

Naalakkersuisut pissusissamisoorsorivaat, e-sportip ilaalernissaa siunertaralugu, timersornermut inatsisip allanngortissinnaanissaa, timersortartut kattuffiinik aamma e-sportimik aallutaqartut aallartitaannik peqatigalugit eqqartuilluarneq tunngavigalugu ingerlassasoq. Tassani aamma nunani allani e-sportimut tunngatillugu misilittakkat nalilersorneqarsinnaassapput. Tassungalu atatillugu e-sportip timersornermut ilaasutut akuerinngikkaluarlugu timersornermut sutigit qanorlu iliornikkut ilaalersinnaanera oqallisigineqarsinnaassaaq. Taamaammat Naalakkersuisut taamatut oqaloqatigiittoqarnissaanik aallartitsiniarput.

Tamanna tunuliaqutaralugu allannguutissatut siunnersuut una saqqummiunneqarpoq:

”Naalakkersuisut timersorneq pillugu inatsimmik allannguinissamut periarfissanik misissueqqullugit Inatsisartunut aalajangiiffigisassatut siunnersuut. Misissuinermi qulaajarneqassaaq e-sport timi atorlugu timersuutitut allat naligalugit akuerineqassanersoq. Misissuinermi attuumassuteqartut ilaatinneqassapput, matumani ilaallutik timersornermik kattuffiit. Misissuineq Inatsisartunut UKA 2022-mi agguaanneqassaaq.”